



**27 de maio de 2010.** Sorprende que SOGAMA, unha industria creada para evitar a contaminación dos residuos urbanos, sexa unha das máis poluintes de Galiza: Cada ano emite á atmosfera 327.000 Tm de CO<sub>2</sub> (equivalente as emisións de 136.000 vehículos); 154 Tm de NOx; 309 Tm de partículas e 14,6 kg de mercurio. Destacan tamén as verteduras de auga industrial, 548.318 m<sup>3</sup>

, equivalente ao consumo dunha poboación de 10.000 habitantes, e de metais pesados, en especial arsénico (13,7 kg), cadmio (5,48 kg) e mercurio (3 kg), aparte dos fenois (27,3 kg) de efectos canceríxenos e teratóxenos. Alén de "tratar" residuos urbanos, SOGAMA tamén produce residuos perigosos, 31.500 Tm en 2008, fundamentalmente cinzas. Estes datos están tirados do

### [Rexistro Estatal de Emisións e Fontes Contaminantes \(PRTR\)](#)

. Con semellante *curriculum*

, como pretende a Xunta seguir apostando polo modelo SOGAMA no seu PXRSUG 2010-2020, e moito menos ampliálo, para "tratar" a maioría dos residuos urbanos?

No rexistro PRTR, non se citan as emisións a atmosfera de monóxido de carbono, dióxido de xofre, doutros metais pesados alén do mercurio, nen das dioxinas e furanos, substancias moi tóxicas producidas pola incineración. Na incineradora quéimanse tamén produtos farmacéuticos (400 toneladas só en xullo-agosto do 2009), práctica que podería presentar problemas para a saúde humana polas emisións de diversas de substancias químicas procedentes dos medicamentos. Considérase que o 72% dos restos de medicamentos depositados nos puntos SIGRE das farmacias do Estado dende 2002 acabaron no vertedoiro de SOGAMA, e menos da terceira parte destes residuos foron reciclados.

En canto aos **consumos**, o "Complexo Medioambiental" de Cerceda consome anualmente, 1,3 millóns de m<sup>3</sup> de auga, máis que a maior fatoria industrial de Galiza, a fábrica PSA de Vigo. O volume de auga gastado por SOGAMA chegaría para abastecer a unha vila de máis de 21.000 habitantes. O consumo de electricidade, 40.513 Mwh, tamén é alto e abondaría para satisfacer as necesidades unha vila de 27.000 habitantes. Curiosamente, SOGAMA gasta máis enerxía da que produce, sendo o principal responsábel deste balanzo enerxético negativo as 2.772.457 Nm<sup>3</sup>/ano de gas natural, usado fundamentalmente para "secar" o lixo antes de queimalo.

Esta é a realidade do modelo SOGAMA, un auténtico despropósito ambiental, unha verdadeira ruína económica para os concellos e un inmenso risco para a saúde da cidadanía, que a Xunta pretende agora reproducir perpetrando unha nova incineradora sur do país.

Pódense consultar os datos de SOGAMA fornecidos polo Rexistro Estatal de Emisións e Fontes Contaminantes (PRTR) nesta [LIGAZÓN](#).